

中華全國
名勝古蹟大觀



貴州

第一卷

大陸圖書公司
行 印

中華名勝古蹟

第十五編 廣東

一 廣州

廣州舊稱羊城。秦置南海郡。漢初南越王趙佗據之。及武帝元鼎六年收復。仍爲南海郡。三國吳始置廣州。五代時南漢劉隱都此。號興王府。元爲廣州。明爲府。其地東北負羅浮山脈。適當三江之冲。積層土脈膏腴。甲於全省。府城據珠江北岸。粵漢鐵路發軔於府城之西。達於佛山。循珠江北岸止於三水。復自府城北通湖南。以達漢口。

白雲山

白雲山在番禺縣城北。山多白雲。秦安期生隱居於此。自號抱朴子。始皇遣人請之至。與語三日夜。賜金璧數萬。皆置之而去。留赤玉鳥一兩爲報。廣州

有菖蒲澗。安期所餌也。宋郭祥正詩云。菖蒲澗中生九節。流水遂作菖蒲香。安期服之已仙去。漫說兩鳥留秦王。宋轉運使於山半建亭。題曰天南第一峰。有景泰寺極壯麗。爲明景泰年建。

越秀山

越秀山在番禺縣城內。峰巒聳拔。高二十餘丈。上有越王臺故址。卽世所稱歌舞岡者。爲南越王宮女習樂之處。山頂有鎮海樓。山麓有鎮東樓。山半有半山亭。士人歲時游覽於此。

西樵山

西樵山在番禺縣西南。上有七十二峯。二十四泉。高聳廻環。千態萬狀。極瞻觀之奇。

銅鼓山

銅鼓山在新寧縣東南。層崖疊嶂。俯瞰大洋。風濤觸石。聲如銅鼓。其下爲銅

鼓洋。

珠江

珠江在番禺縣東南。本名粵江。今或稱廣東江。乃合西江、北江、東江、三巨川而成。世傳昔有賈胡盜其鎮國珠。逃至五羊城。國人載金寶堅贖以歸。至此珠墮江中。求之不獲。故名。

沉香浦

沉香浦在番禺縣西北。亦稱投香浦。晉吳隱之投沉香處。舊有亭。隱之清介不踰。爲廣州刺史。操守愈勵。及秩滿歸。其妻齎沉香一斤。爲隱之所見。卽投於湖亭之水中。

貪泉

貪泉在番禺縣西北石門山下。晉吳隱之爲廣州刺史。未至州二十里。地名石門。有水曰貪泉。飲者懷無厭之欲。隱之至此語其親人曰。不見可欲。使心

不亂。越嶺喪清。吾知之矣。乃至泉所。酌而飲之。因賦詩曰。古人云。此水一飲。懷千金。試使夷齊飲。終當不易心。

歸猿洞

歸猿洞在清遠縣東峽山飛來寺後。唐有韋恪者。納袁氏爲室。後至峽山寺。袁持一碧環獻老僧。少頃。有野猿數十。捫羅而躍。若有所歡迎。袁乃命韋爲詩。化猿去。僧方悟。卽沙門向所畜者。玉環其繫頸舊物也。

五羊城

五羊城卽廣州府城。漢初南越王趙佗所築。顧微廣州記云。廣州廳事梁上畫五羊像。又作五穀囊。隨像懸之。云昔高固爲楚相。五羊銜穀萃於楚庭。故圖其像以爲瑞。

宋行宮

宋行宮有四。一在新會縣南水崖。張世傑奉帝昀居此宮。後爲慈元殿。奉楊

太后。一在香山縣南沙埔村。端宗駐蹕於此。一在新安縣梅蔚山。一在新安縣官富場。

南海廟

南海廟在番禺縣東南大海濱。隋開皇十四年詔立南海神祠。唐韓愈南海神廟碑云。南海神次最貴。在北東西三神河伯之上。號爲祝融。天寶中冊尊爲廣利王。因其故廟。易而新之。在今廣州治東南海道八十里。扶胥之口。黃木之灣。

斗南樓

斗南樓在番禺縣後城上。東瞰扶胥。西望靈洲。南瞻珠海。北倚越臺。極山川清奇之觀。

劉王花鵲

劉王花鵲在番禺縣西。卽劉氏華林園。又名西御園。今其遺址尙存。名花異

卉。徧植四周。

崖門

崖門在新會縣大海中。兩崖峻削。壁立如門。宋末君臣播越海濱。奉帝昺駐蹕於此。及至元中。崖山破。爲元兵所迫。丞相陸秀夫驅妻子先入海中。尋負帝赴海而死。

八景

廣州舊有八景。一曰海珠夜月。在珠江海珠。二曰大通煙雨。在花埭煙雨井。三曰琶洲砥柱。在琵琶塔。四曰白雲晚望。在白雲山。五曰蒲澗濂泉。在白雲山蒲澗寺。六曰景泰僧歸。在白雲山上景泰寺。七曰石門返照。在石門山。八曰波羅浴日。在波羅廟浴日亭。

鑒空閣

鑒空閣在舊南海縣城上。宋蘇軾題詩云。明月本自明。無心孰爲鏡。掛空如

水鑑。寫此山河影。

陸公亭

陸公亭在番禺縣東北甘溪旁。元吳萊南海古蹟記云。甘溪在南海東。晉廣州刺史陸公。自西北百餘里。築隄瀦水。南漢劉氏闢甘泉苑。汎杯池。南有陸公亭故基。溪之兩旁。夾種刺桐木。綿花開殷艷如畫。

浴日亭

浴日亭在番禺縣東波羅江上波羅廟前。明高青邱詩。旭日騰霞新浴錦。春波濺雨乍成羅。

越華館

越華館在番禺縣珠江濱。漢初高帝使陸賈說南越尉佗。反覆詳盡。宣漢威信。尉佗稱臣。及還。尉佗傍江構館。以送陸賈。館東三十里有朝漢臺。尉佗於朔望向北陞拜。

花田

花田在番禺縣城西。平田彌望。悉種素馨。五代南漢時美人皆葬此。至今花香甚於他處。

楊子宅

楊子宅在番禺縣下渡頭村。漢議郎楊孚故宅。唐許渾有句云。河畔雪飛楊子宅。

趙佗墓

趙佗墓在番禺縣北五里。墓前石碑題漢南越王佗之墓。墓後有馬鞍岡。風景絕佳。

二 韶州

韶州爲春秋時百粵地。戰國時屬楚。秦屬長沙郡。漢屬桂陽郡。三國吳置始興郡。劉宋改曰廣興。隋曰廣州。唐初爲番州。後改韶州。元爲路。明爲府。地當

廣州府之北。騎田嶺之南。其城在武瀆二水合流處。卽北江上源。北江南會。湟水入廣州界。山高水急。風景絕佳。

涵渾谷

涵渾谷在英德縣鳴絃峰下。谷口廣闊。容納萬景。前有晞陽島。旭光射照。林石閃爍。後有飛霞嶺。日暮霞生。隨風飛揚。又有凌烟嶂。高聳入雲。夢弼巖。幽邃蒼奇。皆爲絕勝之境。

書堂巖

書堂巖在曲江縣城南三十里許。爲唐丞相張文獻公九齡讀書之地。宋余靖亦嘗讀書於此。每當細雨霏霏。暮色迷濛。人處其中。覺萬念皆空。故書堂夜雨。爲曲江勝景之一。

韶石山

韶石山在曲江縣城北八十里。山石玲瓏怪奇。千態萬狀。迤邐而東。有三十

六石。名爲曲江岡。每逢東方未晞。西照將殘。雲氣氤氳。疊起魚鱗羅紋狀。韶石生雲。稱爲曲江勝景。相傳虞舜南巡時。嘗登此石。奏韶樂。和風徐來。聲徹雲漢。韶與曲江之名。蓋取諸此。

皇岡山

皇岡山在曲江縣城北三里。皇岡夕照。稱爲曲江勝景之一。峰巒秀麗。巖石蒼奇。林木葱鬱。藤蘿牽引。翠碧可愛。斜陽西射。如火珠將墮。金鏡初開。誠暮色之最佳者也。

南華寺

南華寺在曲江縣城南六十里儀鳳山上。寺爲南界禪宗佛地。隋時建。唐六祖禪師曾說法於此。暮色方歛。天籟甫寂。寺鐘聲起。響振雲霄。故南華晚鐘。稱爲曲江勝景之一。

逍遙臺

逍遙臺

逍遙臺在曲江縣南。隋刺史薛道衡所建。唐張九齡有陪王司馬登薛公逍遙臺序。

三瀧水

三瀧水在樂昌縣西。爲漢周煜所鑿。名之曰新水、腰水、垂水。驚浪駭濤。振撼山崖。故世謂之三瀧。瀧中有石。奇特險峻。唐韓文忠公貶潮州時經此。作瀧吏詩。遂名韓瀧。

大峒山

大峒山在曲江縣東北。宋余靖游大峒山序云。自州治水行七十里。得月華山。舍州道樵徑。又十五里。乃至大峒。其山磅礴而聳峭。秀倚天際。絕頂之上。千里在目。澗聲泠泠。清入毛骨。

曹溪

曹溪在曲江縣東南五十里。水味甘香。宋蘇軾詩。又試曹泉一勺甘。相傳梁天監元年。有僧智藥泛舶至韶州水口。聞其香。嘗其味。曰。此水上流有勝地。遂開山立寺。名曰寶林。乃云。此去七十年。當有無上法師。在此演法。後果驗。卽六祖禪師所住之南華寺也。

大湧泉

大湧泉在曲江縣城南纂溪。宋余靖築亭其上。爲歲時游宴之地。朱仲新有記云。自有天地。便有此泉。振高僧之錫。而蠟幽人之屐。多矣。若據石臨流。舉酌盡醉。則自我而始。

寶堂

寶堂在曲江縣城中舊府署內。南宋時建。堂壁上深嵌石刻。皆爲宋蘇軾黃庭堅墨蹟。

講書堂

講書堂在乳源縣東二十里毬岡上。岡形如毬。上有書堂。宋進士胡賓王讀書於此。賓王幼時穎悟好學。讀書過目不忘。一室瀟然。凝塵滿几。處之晏如也。清苦廉介。爲世所重。

九成臺

九成臺在曲江縣北城脚。舊名聞韶臺。宋狄咸爲太守時所建。嘗宴請蘇軾於臺上。

讀易亭

讀易亭在英德縣南山上。宋石汝勵解易於此。汝勵少聰睿。讀書別有心悟。其所學巨細不遺。尤邃於易。自號碧廉子。蘇軾頗推重之。元豐年進易學解。爲王安石所抑。

三 南雄

南雄在韶州之東。爲周末楚國地。秦屬長沙郡。漢屬桂陽郡。三國吳置始興。

郡。隋屬廣州。唐屬韶州。五代時南漢置雄州。宋改爲南雄。明爲府。清改爲州。地勢高峻。爲入贛要道。湞水橫貫其間。州城據湞水之北岸。漢武帝命樓船將軍楊僕。出豫章。下湞水。卒平南越。元將呂師夔度大庾嶺。敗宋師於南雄。遂取韶州。爲古今兵事上攻守必爭之地。

大庾嶺

大庾嶺在南雄縣北。其地多梅。冬時雪壓枝頭。皎艷可愛。庾嶺觀梅。爲邑中勝景。故亦名梅關。旁有二山。一爲小庾嶺。一爲嫦娥嶂。崎嶇峻險。唐張九齡開鑿成路。行人便之。

仙女巖

仙女巖在南雄縣城東北。松檜葱鬱。泉石潺湲。上有二仙像。相傳秦時二女子修煉處。

卓錫泉

卓錫泉在南雄縣北大庾嶺上雲封寺東。泉水自石穴湧出。飛沫濺白。如吐連珠。其流縈廻有緻。味絕甘美。清冽可鑒毫髮。昔有大鑒禪師傳鉢南歸。卓錫於此。泉因以名。

張九齡宅

張九齡宅在南雄縣桂山中。唐張九齡未第時建。其中几案皆白石琢成。至今猶存。九齡字子壽。七歲能屬文。少時嘗養羣鵠。與親知書。則繫足依教往投之。謂之飛奴。後擢進士。又以道侔伊呂科高第。爲中書舍人。爲詞人之冠。時號爲文場元帥。遷左拾遺。玄宗千秋節。羣臣皆獻寶玩。九齡乃述前世興廢之源。爲書五卷。謂之千秋金鑑錄。以伸諷諫。

種玉亭

種玉亭在南雄縣舊州署內。宋章得象建。得象字希言。爲人莊重。深厚有容。持守法度。不越尺寸。仁宗時累官翰林學士。在中書八年。凡宗黨親戚。抑而

不進。其公直如此。

珠璣巷

珠璣巷在南雄縣城內沙水寺之前。世傳廣州梁文康霍文敏諸望族。皆發源於此。文康名儲字叔厚。文康其諡也。明成化十四年。舉會試第一。選庶吉士。授編修。歷官太子太傅。建極殿大學士。武宗好盤游。儲再三泣諫。卒止江漢之行。霍韜字渭先。學博才高。量褊隘。所至與人競先後。多所建白。亦頗涉國家大計。累官禮部尙書。卒諡文敏。

四 連州

連州在韶州之西。劉宋置小桂郡。梁分置陽山郡。隋置連州。後改爲熙平郡。唐改爲連山。後復爲連州。今改爲縣。其地據九疑山之陽。湟水之上游。高峻爽嶢。四時咸宜。州城瀕於湟水之岸。唐劉禹錫謫貶爲連州司馬。卽其地也。

中山